

Upravni odbor Vijeća za implementaciju mira razmatrao aferu ORAO (Izmijenjeno 27. novembra 2002. godine)

Danas su se politički direktori Upravnog odbora Vijeća za implementaciju mira u Briselu sastali sa BiH predsjednikom Mirkom Šarovićem i premijerom RS Mladenom Ivanićem da bi razgovarali o aferi ORAO. Visoki predstavnik, Paddy Ashdown, je nakon sastanka rekao da Upravni odbor smatra da je privremeni izvještaj koji su dostavili organi vlasti Republike Srpske neadekvatan i da se istraga mora nastaviti uz angažiranje međunarodnih predstavnika.

Visoki predstavnik je rekao Šaroviću da je ovo od završetka rata, prije sedam godina, najozbiljniji propust države Bosne i Hercegovine u ispunjavanju njenih međunarodnih obaveza – on ne vjeruje da organi vlasti Republike Srpske ne shvataju ozbiljnost ove afere. Upravni odbor Vijeća za implementaciju mira je također naglasio potrebu za potpunom i javnom istragom u cilju identificiranja odgovornih osoba, kao i za sveobuhvatnom reformom kako bi se osiguralo da se ovako nešto više nikada ne ponovi. Visoki predstavnik je rekao da je Upravni odbor pozdravio napredak postignut u pravcu uspostave režima za kontrolu izvoza oružja na državnom nivou, ali je također naglasio da Bosna i Hercegovina mora uraditi daleko više od toga.

Visoki predstavnik je također izvijestio o raspravi u vezi sa neophodnim predstojećim ekonomskim reformama u Bosni i Hercegovini. Zaključeno je da će svi građani Bosne i Hercegovine snositi ozbiljne posljedice ako državni i entitetski organi vlasti ne ubrzaju implementaciju temeljite ekonomske reforme. Ujedinjenje carinskog sistema će zaustaviti

dupliciranje poslova i pronevjeru, Uvođenje PDV na državnom nivou pojednostaviće sistem oporezivanja, te smanjiti i uskladiti zakonsku regulative u poslovnom sektoru na cijelom teritoriju Bosne i Hercegovine. Upravni odbor Vijeća za implementaciju mira je jedinstven u stavu da su ove mjere neophodne na državnom nivou kako bi se promoviralo jedinstveno tržište koje će privući strane investitore.